

E Nzambi ame, wiza kunsadisa ;

E Mfumu, zabula unsadisa.

Nkembo kwa Tata... Konso kwakadila...

Sambu kua Vundu dia koko kualunene

E Mvuluzi ame anzolua Yezo wakomwa vana kuluzu, mbukamene vana malu maku vamosi ye Santu Maria ye Banzio ye Basantu bawonso ba zulu, muna vana luzitu kua vundu diaku dia koko kualunene.

Matondo ikuvana mu diambu dia nzola ilembi suka wakala yau mu mona mpasi zozo zanene mu diambu dia fita masumu mame. O masumu mama bela ibelanga mo mu nsi ame a ntima.

Dodokolo diaku, e Mfumu Yezo, vana kua Dibundu lusadisu luaku kayelesa mbeni andi ; sadisa bana bandi mu landa nzil'a nsiku miaku.

Tat'eto... Ikukunda Maria... Nkembo...

kua Vundu dia koko kualumonso.

E Mvuluzi ame anzolua Yezo wakomwa vana kuluzu, mbukamene vana malu maku, vamosi ye Santa Maria ye Banzio ye Basantu bawonso ba zulu, mu vana luzitu kua vundu diaku dia koko kualumonso.

Ndoloki ikuvana mu diambu dia basumu-ki ye bau hena fwanga mu ntangu yayi ; ntete-ntete mu diambu dia yawu batunanga viluka ntima kuna kua ngeye ; dodokolo diaku. ubafwila kiadi.

Tat'eto... Ikukunda Maria... Nkembo...



E Yezo ame, umfwila nkenda.

Sambu kua Vundu dia kulu kualunene

E Mvuluzi ame anzolua Yezo-Kristo wakomwa vana kuluzu, mbukamene vana luse luaku vamosi ye Santu Maria ye Banzio ye Basantu bawonso ba zulu, mu vana luzitu kua vundu diaku dia kulu kualunene.

Dodokolo diaku e Mfumu Yezo vanga wo vo vana vena Banganga zaku ye bau batu-mbamene kua Ngeye, vabilamena mvuma zazingi za busantu.

Tat'eto... Ikukunda... Nkembo...

kua Vundu dia kulu kualumonso.

E Mvuluzi ame anzolwa Yezo-Kristo wakomua vana Kuluzu, mbukamene vana luse luaku vamosi ye Santu Maria ye Banzio ye Basantu bawonso ba zulu mu vana luzitu kua vundu diaku dia kulu kualumonso.

Ikudodokela mu diambu dia luvuluzu lua mioyo mia kombelo, ntete-ntete e mina mi-luta zitisanga mavundu maku masantu una miakala zinga va ntoto ; fwila mio nkenda ye lwakisa mio kuna zulu.

Tat'eto... Ikukunda... Nkembo...

kuna kua Vundu dia Luvati lu Yezo.

E Mvuluzi ame anzolwa Yezo-Kristo wakomwa vana Kuluzu, mbukamene vana luse luaku vamosi ye Santu Maria ye Banzio ye Basantu bawonso ba zulu, mu vana luzitu kua vundu diaku dia luvati luaku luasantu.

Nzolele kusambila mu diambu dia wantu awonso bandombele wo ; dodokolo diaku, ubasambula, ubawila.

Tai'eto... Ikukunda... Nkembo...

V/ E Santa Maria, Ngudi a Mipasi zingi

R/ Utusambila. (nkumbu tatu)

E Yezo wakomwa vana Kuluzu, vwise ngolo kua bisambu biame muna mafwana ma Mipasi zaku, umpana busantu bua luzingu ye grasia ya tambula zisakramento mu ntangu a lufwa luame. ye nkembo a luzingu ke lumani. Diakala wau.

Kintwadi kia Minlongi mia Kuluzu diasantu ye mia Santa Maria wakondwa sumu kikadilanga ku Torino (Italia) kuna kua Bafrere des Ecoles Chrétiennes. Kintwadi eki kiayantikidi kia 9-5-1914. Lukanu luandi olu: bakisa vana vena bakatolika luvuminu lua mambu ma Nzambi ye ntim'ansungididi muna lusadisu lua luvuluzu lua mioyo mia wantu.

Ba-Kintwadi eki bakadilanga ba mpila tatu: 1° Minlongi mia katekisimu; 2° Mimwanginisi; 3° Misonami.

1. **Minlongi**: i bau babakidi dipolomo ye balonganga malongi ma Nzambi. Bavwidi tukutukanu tuau, nkinzi miau ye nkankinu miau.

2. **Mimwanginisi**: i bau basonekese nkumbu zau muna Kintwadi ye basadisinga bamilongi muna salu kiau. Bonso balendele wo, balungisa ema malanda:

1° Konso lumbu basambila „Luvuminu lua Yezo-Kristo wakomwa vana Kuluzu” ye basinsa lo zayisa kua ankaka.

2° Batambula Komunio kana ntambula mosi konso ngonda.

3° Bayikama ku Likutakanu ya basala nsadilu yisongelo kua Mbuta a Likutakanu wa belo kiau.

3. **Minsonami**: i bau bawonso basonekese nkumbu au muna Lubundanu ye bateza lungisanga lumbu ka lumbu mana masalwanga muna Lubundanu.

Tuyambulu ye tuve.

Bau basanamene mu Lubundanu lua milongi babundananga:

1) muna mambu mambote masalwanga kua Bafrères des Écoles Chrétiennes ye kua bankwalubundanu lua Minlongi mu diambu dia mwangasa luvuminu lua Yezo-Kristo wakomwa;

2) muna bisalu biambote biawonso bisalwanga kua Batata ba Santu François (Frères Mineurs);

3) muna bisalu biambote biawonso bisalwanga muna Lubundanu lua Minsadisi mia Santu Maria (Servites);

4) muna makabu mawonso makimuanda mawwa kayilwa kua Lubundanu lua Annonciation, lukadilanga kua Batata Jésuites ku Roma;

5) muna makabu mawonso makimuanda mawwa kayilwa kua minsadisani mia Batata ba Santu Jean Bosco.

Lusambulu lua Papa

Tusambila Mfumu Nzambi kavana grasiya zandi zafwana kua Nkuluntu ye kua bau bawonso basanamene muna Lubundanu lua Yezo wakomwa, lukadilanga ku Torino, kadi Banganga za Nzambi muna malongi mau ye muna mbandu zau zampwena ye konso muntu mpe muna busantu bua luzingu luandi, bafwete telekela kimbangi muna Yezo-Kristo ye muna Kuluzu diandi.

Propriété réservée.

Matadi, le 22 mai 1962

† Simon N'ZITA

Luvuminu lua Yezo-Kristo Wakomwa

Diambu dia Luvuminu lua Yezo-Kristo Wakomwa vana Kuluzu diasinama ye diamuanganesua kua Frère Léopoldo, wa Batata ba Santu François, wafwila lufwa luandi luasantu ku Torino, kina kia 27 janvier 1922. Frère Leopoldo yandi kibeni wazayisi dio kua Bafrères des Écoles Chrétiennes kinumana bamwangesa dio muna nsi ye nsi, mu lusadisu lua Lubundanu lua Minlongi mia Kuluzu diasantu ye mia Maria wakondwa sumu.

KUMA kia Luvuminu lua YEZO-KRISTO WAKOMWA

1. Fita ndoloki kua Mfumu eto Yezo-Kristo muna tuvwezo tuayingi tua mindembi kwikila ye bantokozi basinsanga kunkatula muna sikola, muna mafamilya ye muna kala mpalalani bantu ye bantu.

2. Nikunisa muna ntima mia bakristo lubelo lua masumu, ye luzolo lua Yezo-Kristo muna kuntambula ntambula zayingi muna Komunio zambote.

3. Tomesa luzingu lua kimukristu muna mafamilya ye lusansilu lua bamatoko-yendumba: sadisa muna luvuluzu lua ntima mia bapakanu ye basumuki.

Weyi bavumina Yezo-Kristo wakomwa.

Ovo dilendakene, fukamena vana vena fwaniswa kia kuluzu: kunda ye luzitu mavundu matanu ma Yezo. e bosi sambila bisambu ebi bilanda, mu diambu dia lomba masumu ma wantu ankaka. Basambila luloloko lua masumu ma yeto kibeni ye bisambu bilanda: